

Нешла бек1а

Замана аркьулри. Ятимтачи дак1уулхъуси аги. Нешла мякьлаб буг1ярагибси Батир Жавгъарличи аркьули сай, рузини ил сунечи к1ап1урцули сай. Ца бара урк1ухъни чебарбякъунси Юсуп гъанна пикрумани кьакъавак1ахъили сай. Илис гъанбикиб, секъяйда гъачам саби бареси х1ебалули г1ямал буунси нешли бирг1ябиргибал. Беркеси агарли, дурх1нани кьакъарак1ахъибси нешли, илдала урк1би паргъатдиахъес, лех1кахъахъес царх1ил балбуц х1ебаргили, шинни биц1или ц1аличи шанг чебизурсири ва ила ц1убх1яр къаркъа дурх1надихъибтири. Делхъира или илди ахтардидирули к1ел барх1ехълизиб нешли дурх1ни х1ербарибтири. Юсуп пикриик1улри, чула тухум Мусахъала хъалибарг секъяйда гашазибадра дяг1язибадра алхунал ва чусра ил кьадарбирусира или. Илис гъандиркулри сай садакъаличи вашух1елла анц1букъуни: ца барх1и секъяйда сай Рустамхъала чехусанси урши Къасумличил вях1ибал, ва секъяйда илала бег1тани сай урк1ец1иагарли витибал. «Сен, - или хъарик1улри Юсуп сунези сай, - цабех1 давлачебли, дец1 агарли сакълала палтарчебли х1ербирути, цабех1 ишцад къарцинти?». Амма жаваб баргес вирули ах1енри. «Гъу, гъанна се бируси? Яни х1ебиалри, дуг1ла ц1едешалра дурчес дашех1ери, гъанна къиянни саби, шантира гушли саби», – пикриик1и ил бишт1аси урк1илизи халаси кьут1къуси дард хъурабиублири.

Х1ери баиб. Чилра дак1ух1евхъун. Юсупра Жавгъарра урга-ургади «се бирех1е гъанна нушани?» дик1ути бисали дамкъахъурти х1улбачил цаличи ца х1ербик1улри. Гъачамлис х1ехарли левалси, селра х1ергъуси вишт1ал узи, илди хумарли чебиух1ели, сайра хумарирулри. Илди бисалри, сайра висулри.